

## GUILTS NE PQUIAA SANTIAGW

¡Diuzh to grëse to!

<sup>1</sup> Naa nac Santiagw, tib zha ne quiayuñ xtsiñ Dios, tib zha ne quiayuñ xtsiñ Jesús, men̄ ndzon ne rnabey. Laa naa rquiaabdiuzh to grëse to ne nac to zha ne ziaad lo xtii Israel, tel pa lotaa nac guidzliu ne no to.

<sup>2</sup> Bets, bzian, ndal ncuaañe rded ne parne glu dien̄ pe nli dib zdoo ne rnalo ne Dios. Tel pe nac-taa ncuaañe noded to i, ib gacmbande to, sinque golley. <sup>3</sup> Sac gon̄, zeeñe squi ran̄ ne grë pe guielnë, ga rseed ne tibliladz rac ne tel̄ petaa noded ne. <sup>4</sup> Golseed sca tibliladz golgac. ¡lb guiaañd zdoo to tel petaa nac guielnë ne gan̄ to! Sac zeeñe sca cseed to gan̄ to guielnë, zac to tib zha ne dziits so lo Xtiidz Dios, tib zha ndzinli, tib zha ne ib peet gdziebd.

<sup>5</sup> Zha ne racladz ygaa guielbiini co, zac gnab zhow lo Dios, ni mesi gon̄ zdeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me. <sup>6-8</sup> Lëëraasi dib zdoo ne none gnab new, nodne gacchop guic ne; sac zha ne racchop guic, gdziñd dze ygaa zho miñe rnab zho. Nac zho, tib dze dib zdoo zho rliladz zho zgaa zho miñe rnab zho, stibga a dze na rliladzdraa zhow, ib ractiblid guic zho; masaque nac zho zig nac grë mtsiñ ne rbib lo nisdoo, sac tel̄ mtsiñ co loxaque nëzrii nëzrec zienie mew.

**9** No zha bets ne, zha bzian ne, quianied zho ncuaane yquiin zho, par miech peet nond zho; per none gon iné gley zho sac nroob non zho lo Dios. **10-11** Scagaa zha ne rapchen, none iné gley zho niina ne biaanwin zho, sac næz lo Dios grë ncuaane rap zho nonda. None guieñ zho niicle ne nroob rapchen zho, zeene laa zho gbi lo guidzliu rii nuque guiaan grë ncuaane rap zho. Masaque nacse zho zig nac guieen grë guizh ye, tel guiee cow, zhixtsëëse ngbidz rcuiidz guizh ne zoba lo, rlozh ga rliaalgaw, gataa rnitlo xquielniowa.

**12** Dichos zha ne ib rzozite lo Dios niicle no nzian ncuaane rcheep zho gunctal zho xtol zho, per rund zhow; sac zha cosi zgaa zho tib guielmban ne gdziñd dze lozh, guielmban ne bneele Dios gdeed me lo grëse zha ne rleynie me. **13** Zeeñe sca no ncuaane rcheep ne gunctal ne xtol ne, guiabd ne togo Dios noquiil ne gun new; sac gon led yed Dios rzoobladz ncuaane ndzinlid, ni niicle rquiildgaa me miech gun zhow. **14-15** Grë ncuaane ndzinlid ne rzoobladz ne, grë ncuaan yozh ne rionie guic ne, miñ co nac miñe rquiil ne. Lëew nac miñe rcheep ne runctal ne xtol ne, ni ndionle ne ganle, lëe gdib miñe gdeed dol lo miech nac guielnëdox ne ygaa zho.

**16** Bets, bzian, gac-wete to sca. **17** Golguien ganle, ncuaane rquiin, ncuaane ndzinli, miñ co nac miñe rneedz Dios. Tibaque nac me, led yed me rdzëë par guiab ne meque rnabey rac guielntseeb. Me nac tib biini ne gdziñd dze guiuu, ni tib lë guielcow guienz zaatne no me. **18** Zdoo me gola bneedz me tib guielmban ndzon lo ne niina ne laa bliladz Xtiidz me, masaque rrieequia ne nac mëëdglo lo

me.

### *Nacda yquiaadiagse miech Xtiidz Dios*

**19** Bets, bzian, ne nac to zha ne rleynie naa: Golgacnañ ganle, ne ne nac ne zha ne no xnëz Dios, none dzioxcoraa ne yquiaadiag ne, zeeñe gnee ne none guien ne pa lotaa gnee ne, ni Gund ne ne rnadse pew laa ne glëele. **20** Sac gon, zeene rlëë ne, grieelod gun ne ncuaane rdziladz Dios. **21** Golguien sca, golsaan grëtaa ncuaane ndzinlid ne ziyun to, golbiche lo grë guielntseeb ne znutaa quiayac niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëew rlu zha laa to lo dol.

**22** Per guiabde to togo loxaque yquiaadiagse to Xtiidz Dios lëëlew ga; sinque ib none gban to mine rquiaadiag to, sac tel ib gbande tow lëëque to noquidie to ga. **23** Sac zha ne rquiaadiag Xtiidz Dios, ni rband zhow, rzac zho zig rzac ne zeeñe rwi ne lo ne lo quiewan: **24** Sac zeeñe nowi ne lo quiewan, hor cose ran ne zha rac ne; zeeñe laa ne rbiche low rsoladzdraa ne zha rac lo ne. **25** Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zuñlay Dios zho lo grëtaa ncuaane gun zho.

**26** Gacxe waa, zha ne rnee xnëz Dios no zho ni rgobeyd zho pe rnee zho, lëëque zha noquidie zho ga, ga rlu nlid zienal zho mine rnabey Dios.

**27** Sac gon, par Dios men ne nac Pxoz ne, zha ne no xnëz me none tsie zho tsieguñ zho xyudar grë mëedbziab, tsieguñ zho xyudar grë wnaa ne ret

tsieel, ni tsoxco zho zaacse gban zho, ib tsienald zho ncuaaŋe ndzinlid ne run grëraa miech.

## 2

### *Lëda ga run zha ne rbe*

<sup>1</sup> Bets, bzian, gunde to ne ncueese lo miech ne gnee to, sac zha ne sca run, zha dieŋ guiab zho xnëz Jesús no zho. <sup>2-3</sup> Ron naa, zeeŋe rlanso tib zha ricw zaatne rcaalsa to i, nacw zho xab niazh zho, no grë xnil or zho nia zho, lëlēd rio to dien pa lo wenraa sob zho; laa zeeŋe rlanso tib zha mban beelze nac xab yeen, rnee to lo zho: “Ise bzo, telne racladzgaa luu sob luu, lo liuse i bzob.” <sup>4</sup> ¿Pe sca na rac zha ne no xnëz Jesús? Zha ne gon sca run, ga rlu zho niapse guielntseeb no guic zho.

<sup>5</sup> Lëda ga gon bets, lëda ga gon bzian. Golgacnaŋ ganle, ible Dios ble miech ne peet rapd lo guidzliu rii, zeeŋa dib zdoo zho gnalo zho me, zeeŋa ygaa zho zaatne bneele me gdeed me cuëz zha ne noxco rleynie me. Gotsaa gwi ne sca ganle, zha ricw nac zho nëz lo Dios; <sup>6</sup> laa to gon, no to rlozhd gzhidznie to zho. ¿Pe ib riende to, grë zha ricw co nac zha ne rsacsi to? Rgobniu zho to, riezo zho to lo wxtis; <sup>7</sup> haxta rdzibdee zho Jesús, men ndzon ne nacnie to niina.

<sup>8</sup> Ib none gban ne zigne rnabey Xley Dios, lo xley me zhobnee: “Bleyne samiech luu, zigne rleynie luu luu.” <sup>9</sup> Golguien gon, dol i noyuŋ to squi rbe to dien cho nac zha ricw, chogaa nac zha mban; sac Xley Dios i quiaguiits to. <sup>10</sup> Golgacnaŋ ganle, zha ne rguiits tibaque xley Dios, niicle maase zienal zho grëraaw, laa zho beenctal-le xtol zho ga, rzacaque zho zig zha ne noguiits grëw. <sup>11</sup> Sac tibaque men

ne psaña grësew. Gacxe waa, tel zha ne zienal miñe rnee: “Gute luu samiech luu”, per rguiits zho miñe rnee: “Yquiangobd luu zha ne led tsieeld luu”, laa zho beenctal-le xtol zho ga. <sup>12</sup> Niowse sca golgac, niicle zeene gneegaa tow, niowse golñee; sac gon, zdzin dze cxobadol ne dien pe wban ne zigne rnabey Jesús, te wband new ye. <sup>13</sup> Grë zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guielñëdox ne cxeel me.

### *Zha ne rnalo Dios none glu zhow*

<sup>14</sup> Bets, bzian, ¿pa dien rquiin guiab ne dib zdoo ne rnalo ne Dios, xnëz me no ne, ni tel rund ne xyudar samiech ne? ¿Niacxe scasse laa Dios csilaale ne? <sup>15</sup> Gzoob ne no zha ne nacgrë to i, yase tib bets tow, tib bziangaa tow, ranlo to guieñd xab zho, niicle quianied zho ncuaane gow zho; <sup>16</sup> ni guiab to lo zho: “Csacsid luu luu, got xabnal luu, dow ncuaane racladz luu”, per loxaque diidz sca guiab to, ni gdeete to ncuaane run falt lo zho. ¿Pa dien yquuin diidz co? <sup>17</sup> Scadaa nagoñ paat rquiinda guiab ne rnalo ne Dios, ni tel rund ne miñe rieguial ne gun ne. <sup>18</sup> Gacxe waa, zha ne rnalo Dios ni run zho miñe rieguial zho, no zho gnë lëda i run zha ne rnee lëëlew ga totsaque gnalo ne Dios. Ni rap zho rson, sac grieelod glu ne rnalo ne me, telne rund ne miñe rieguial ne.

<sup>19</sup> Nli wena run zha ne rliladz tibaque Dios no, per grieelod guiab zho lëëlew ga, sac gon zig nac meñdox ye ma rliladz tibaque Dios no, per led por miñcod laa ma lo guielñë ne cxeel me, sinque

haxta rdzieb ma me. <sup>20</sup> Nadzpaan nxen zha ne sca  
rzac, pe ni lalnu riend zho paat rquiinda guiab zho  
rliladz zho Dios ni telne rund zho minē rieguial  
zho. <sup>21</sup> Golgan ganle, zig nac pxozgol ne Abraham,  
porne been me minē rieguial me gane pcaania  
Dios me zig tib zha ne peet xtol. Led rsoladz to  
ganle, zeeñe rēb Dios lo me tsielogon me xpēed me,  
güey me zaatne pxeel Dios me. <sup>22</sup> Gotsaa gwi ne  
ganle, zeeñe been Abraham mine bnabey Dios me  
ga, ga blu ne nli rnalo me Dios, ni hor co mazdraa  
dib zdoo me bnalo me Dios. <sup>23</sup> Lo Xtiidz Dios  
zhobnee ne scataa dib zdoo Abraham bnalo me  
Dios, gane pcaania Dios me zig tib zha ne peet  
xtold; zéëb diidz, tib zha ndzieeldiiz Dios goc me.

<sup>24</sup> Golgacnañ sca ganle, led loxaque gliladzse  
miech Dios, laa me ycaaniale zho; sinque none  
glu zho nli rliladz zho me, gun zho minē rnabey  
me zho. <sup>25</sup> Golsoladz ganle, scaque wnaa ro nēz ne  
brieelē Rahab, por been me xyudar samiech me,  
gane pcaania Dios me zig tib zha ne peet xtold;  
sac zeeñe gon me noxtseeb zha ne pxeel Josué zie  
wleets ga, bdeed me zaatne biolan zho, ni blu me  
stib nēz ne wbire zho, bgaad zho. <sup>26</sup> Gase na ganle  
rlu, paat rquiinda guiab ne rliladz ne Dios ni tel  
rund ne mine rieguial ne, nacse ne dzigo zig tib  
xcuerp ngutoo, tel cuerپ cow, ¿pa dien yquiina?

### 3

#### *Ncuaane run ludz miech*

<sup>1</sup> Bets, bzian, guiabde to lega tso to glisqui to  
ncuaane run stib miech, sac tsod zha ne demaste  
wen lo guidzliu rii. Zha ne sca run, rzac zho zha  
so cseed zho miech, per gacnañ zho ganle zha ne

rseed miech, mazdraa nroob ncuaane tsasqui lo zho gal dze ne laa zho gacredz lo Dios.

<sup>2</sup> Grëse ne nzian mod ne rxin ne lo samiech ne. Tel niaca miñe no tib zha ne grieelo ycuëez ludz pa lotaa gnee zho, zha cosi cxiñd zho, haxta xcuerp zho zrielo zho gnabey zhaw. <sup>3</sup> Gotsaa gwi ne gañle zig nac guay, con tib lë win guiib ne rgo miech ro ma rrielo rnabey zho ma, rienie zho ma næz ne racladztaa zho. <sup>4</sup> Scaque barcw, niicle ne nrooba, no hor rriee medox lo nis rcheepa, per con tib lë yag lag win ne rsëë miecha, rrielo rienie zhaw næz ne racladztaa zho. <sup>5</sup> Scapaa nagon nac ludz ne; niicle ne winsew, per nroob guielqui ne runa. ¡Ran to gañle tib bzhil yeense name rzobgui dan! <sup>6</sup> Ni tel ludz ne gon, rriequia tib bel ga naca. Tib lë win xcuerp ne naca, per guielqui nroob ne runa, runctala xtol miech. Gun ne cuent tib lë gui ne briee gabil naca; ni dipse lo xquielmban miech noxtseeb zho low.

<sup>7</sup> Golwi gañle, rrielo miech runndoo zho grë ma ne rsiibe, grë ma ne rzelen liu, haxta grë ma ntseeb, haxta grë ma ne no nisdoo, rnabey zho ma. <sup>8</sup> Per guienz zha ne gon grieelo gnabey ludz; ncuaane ntseeb naca, choot grieelod gnabeya; masaque laaw no par gnitlow miech, zigne run grë guizh ncuaan. <sup>9</sup> Lëew name rquiin ne roolnie ne Dios men ne nac Pxoz ne, ni rlozh ga lëequew rdzibdee ne samiech ne, ni lalnu riend ne me bzaa zho, biaan zho zigne rlu me. <sup>10</sup> ¿Pe ga nadien, ro ne roolnie ne Dios, ni roque ne rgodee ne samiech ne?

<sup>11</sup> Bets, bzian, led scada gon. Zig nacse tib zhlian, ¿niacxe zaatne rlanaque nis nex gaque rlan nis yuzed? <sup>12</sup> Tib yag nexgaaw, ¿niacxe rquia xnex

yag oliv lo yag guigw, yquiaagaa guigw lo lbë uv?  
Nañle to gañle racd miñ co.

### *Zha ne nixbiini*

<sup>13</sup> Lo grë zha ne nacgrë to i, tel no zha ne rzac zha nixbiini nac zho, none glu zhōw iné za-acse gbannie zho samiech zho, gac zho tib miech ndooladz zig none gac tib zha nixbiini. <sup>14</sup> Per tel tibaque në rac zdoo zho ran zho zha ne stib noded, tibaque noguib zho csañwin zho samiech zho; gacnañ zho gañle, led scad rac zha nixbiini. Ni lalnu rieguiald tso zho csañziuu zho zho. <sup>15</sup> Led scad nac guielbiini ne rdeed Dios, sinque lëë zhi-wseed mendox ga, lëë miñ co zienal grëraa miech guidzliu. <sup>16</sup> Zeeñe sca në rac zdoo miech ran zho cho stib noded, zeeñe sca tibaque no zho dien zha guianglaa zho lo samiech zho, loxaque dil, loxaque grë guielntseeb rzobni zho ga. <sup>17</sup> Zha ne nli rap guielbiini ne rdeed Dios, runq zho miñ co, laa zho zienal:

ndzinlise gban zho,  
rleynied zho dil,  
rguib zho zaacse rnee zho lo miech,  
wen rac zho lo grëse miech,  
rquia zdoo zho samiech zho,  
runq zho cue zho zha ne mazdraa gacnie zho,  
ncuaañe run zho dib zdoo zho run zhōw,  
niapse ncuaañe ndzinli rioxco zho.

<sup>18</sup> Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdzin dze ne ran zho zeeñe laa grë miech co rac tib miech wen.

## 4

*Zha ne rleynie guielntseeb*

<sup>1</sup> Ne squi tibaque rlëëlsa to, tibaque quiadil to, lëë miñ qui goñ riegal por grë guielntseeb ne rio guic to. <sup>2</sup> Rio to riogui to ncuaane grieelod yquianie to, rlozh ga, haxta rut to samiech to parne yquianie tow. Në rac zdoo to ran to cho zha quianie ncuaane quianiede to, zeene ran to rrieelod yquianie tow laa to rlëënie zho, haxta rdilnie to zho. Rrieelod yquianie to ncuaane racladz to, sacne rnabde tow lo Dios. <sup>3</sup> Niicle tel rnabgaa tow lo me, rneedzd mew, sacne laa guic to zienie yquianie tow loxaque par gdeedguxt zdoo to, gdeedguxt xcuerp to.

<sup>4</sup> ¡Que tal ntseeb to! ¿Pe ib riende to, Dios goñ rlëënie to zeeñe squi rio to rleynie to grë guielntseeb? Sac miech ne squitaa rleynie guielntseeb, lo Dios ga racntseeb zho. <sup>5</sup> Golgan gañle, zha rnee lo Xtiidz Dios: “Espíritu Sant, men ne pxeel Dios nacnie ne, rleynie me ne, ni racladzd me zhaa ncuaane gleynie ne laa ne gleynie ne me.”

<sup>6</sup> Ni tel Dios goñ, noxco me ne, ib zacnie me ne grieet ne lo guielntseeb; sca rnee lo Xtiidz me, zaatne rnee: “Zacnien Dios grë zha ndooladz, sangue grë zha niats, rdziguiend me zho.”

<sup>7</sup> Golguien sca, iné ndooladz golgac, golgon mine rnabey Dios. Gdeetraa to diidz yquiil mendox to, sca golgun zeeña zhal ma gbiche ma lo to. <sup>8</sup> Dib zdoo to golséëb xnëz Dios, zeeña scagaa me zacnie me to. Goltsoxco guiaanmbe to lo grëtaa xtol to, golnab lo me csañmbe me zdoo to, mese gnalo to, gacchopdraa guic to. <sup>9</sup> ¡Golguien gañle, ndzinlid i

squi mban to! ¡Mban golgac, goltso guielnë, golgoon, laa ne tso to gzhidz to, laa ne tso to gley to!  
**10** ¡Ndooladz golgac lo Dios, zeeña cuee me to lo grë ncuaane nac to, csanglaa me to!

**11** Bets, bzian, ib gneenëde to zha ne nacgrë to. Zha ne rneenë bets zho, bzian zho, bel zho, ni rdziibdol zho zho, Xley Dios ga rguiits zho. Laa ne so zho gacladz zho zha gun guielwxtis, mazd tsoxco zho gban zho zigne rnabey ley. **12** Golguien ganle, Dios psan ley, ni mese rieguial gun guielwxtis, me nañ zho cuibdol, chogaa csilaa me; per to nadien, ¿cho nac to par gdziibdol to samiech to?

**13** Togaa ne nac to zha ne rnee: “Na gzhe widz dien pa tib guiedz ne guioo ne, guiobiaaz ne ga tib iz, ga dziuun ne wzi dziuun ne wto, dziuunlo ne dimi”, golquiaadiag miñe gne naa lo to ganle. **14** Ne sca rnee to, ¡pe wen wen nañ to dien yo to gzhe widz co! ¿Pe ranđe to lega nacse xquielmban ne zigne nac xców las ne rbe ral sil? Zhisaque rbew, zeeña rlozh ga rludraa dien yow. **15** Mazd golguiab: “Telne zneedz Dios diidz gbanraa ne, min rii, min rii dziuun ne.” **16** Led tsode tibaque guielniats qui zienie guic to, golguien guielntseeb ga run zha ne rac niats. **17** Ni golsoladza ganle: Grëse zha ne nañpaa pe nac ncuaane ndzinli ne no gun zho ni rund zhōw, xtol zho ga runctal zho.

## 5

### *Zha ricw ne zienal guielntseeb*

**1** ¡Grë zha ne rapchen, zha ne zienal loxaque guielntseeb, golquiaadiaga ganle! Golgoon, golquiaadan redz niina, sac gon nroob nac guielnë

ne gañ to. <sup>2</sup> Grë ncuaañe beenlo to i, peet nonda, lega naca zig nac grë ncuaañe biodzle; grë xab to i, rrieequia ncuaañe dowle mxila. <sup>3</sup> Grë guib or, grë guib plat ne squitaa quianie to, rrieequia noloozhle bioochena; ni scadaa gon nitlo to, masaque gac to zig tib ncuaañe riab lo gui.

Laa to beenlo grëtaa dimi qui, rzac to lëëw yquiin to leñ dze ne ziaad, ni nañde to gon laa dze ne nitlo to ziaadyoble. <sup>4</sup> Lëë grë dimi qui gon zëëb to lo grë zha ne quia xtsiñ to, noquidie to zho rguizhde to xtse zho. Per golgacnaña ganle, grëse redz ne rquiaa zho zeeñe mban rac zho squi rsacsí to zho, laa Dios binlew. <sup>5</sup> Lo grëtaa iz ne mban to lo guidzliu rii, loxaque grë ncuaañe gdeed guxt zdoo to, grë ncuaañe gdeed guxt xcuerp to noxco to, ncuaañe yozh ne riaabtaa guic to laa to runa, ib riende to laa dze ne nitlo to ziaadgaxle. ¡Lëë to noyuñ xcuent ma ne noro par guet ma! <sup>6</sup> Pe zhista guielntseeb ne quiayuñ to, haxta zha ne peet xtold, zha ne nañd glis nia lo miech, rquiaqui to zho ncuaañe rund zho, rnabey to ret zho.

### *Nodne guieed zha ne rnalo Dios*

<sup>7</sup> Bets, bzian, sangue to gon tibleque golgac haxta gañ to gdziñ dze ne laa Jesús guiaad stib, tel petaa ruñ miech to peet tsienied guic to. Golgac zig zha ne ran, tel zha cow, zeeñe rlozh rlaal zho bni liu, tibleque rac zho gdipse len mëë guie, rquiaambëz zho haxta rdziñ dze ne rlaap zho. <sup>8</sup> Tibleque sca golgac. ¡ib guiaand zdoo to, sac gon zhile gdziñ dze ne laa men ndzon ne rnabey ne guiaad stib!

<sup>9</sup> Ib tsode to guieednie to grë zha ne nacgrë to, zeeñä gunçtalde to xtol to; sac zhile gdziñ dze ne

laa men ne no gun guielwxtis guiaad. <sup>10</sup> Golsoladz ganle, grë zha ne biadteed xtiidz Dios padzeela, niicle nroob guielnë gon zho, per tiblique goc zho. <sup>11</sup> Zig nac Job, nañaxe to ganle zha nactaa guielnë ne gon Job, per ib bieete me, ni blozhse gon me guielnë co nroobraa guielnzaac ne bdeed Dios lo me. Ga rlu ganle, zha ne sca rdeed me diidz ran guielnë, led lega ranz zhōw; sac nquialadz me miech, rquia zdoo me zho. Dichos grë zha ne sca nac.

<sup>12</sup> Bets, bzian, zeeñe tsiegala glu to diidzli rnee to, tsode to gzeet to gbaa, gzeetgaa to guidzliu par gliladz miech xtiidz to; guiaab to: “Lëpaa gbaa qui”, “lëpaa guidzliu rii”, dien peragaa gzeet to. Tib diidz ne nliw, golguiab: “Nliw”, tib diidz ne nlidgaaw, golguiab: “Nlida”, zeeñä gunctalde to xtol to; sac gon zha ne runctal xtol, ible zgaa zho guielnë ne csiaab Dios.

<sup>13</sup> Lo grë to, zha ne no pe tib lo guielnëw, gnab zho lo Dios gacnięn me zho. Zha ne no pe tib guielbleya, goolnie zho me. <sup>14</sup> Zha ne rzacnëgaaw, gnabey zho gacredz bla zha ne zo lo to, zha co quëeb nceit guic zho gnab zho lo Dios guiac zho. <sup>15</sup> Telne dib zdoo zha co gnab zhōw lo Dios, zunguiac Dios zha rzacnë co. Zlische me zho lo xquelguidz zho, ni tel por pe falt ne beengaa zho lo me sca rzacnë zho, zuñ me zhōw perdon.

<sup>16</sup> Gacxe waa, tib tib to zeeñe run to pe tib falt, yqueetsde tow, golzodiidza lo zha ne nacgrë to, lozhse ga golnab lo Dios gun me to perdon, zeeñä guiaanmbe to lo me. Sac tib zha ne biaanwenle nëz lo Dios, zeeñe sca pe rnab zho lo me run mew, niicle ncuaañe mazdraa ngaña. <sup>17</sup> Golsoladz

Lí ganle, men ne biadteed xtiidz Dios lo miech padzeela, samiechaque new, per dib zdoo me bnalo me Dios. Tib dze bnab me lo Dios csiaabd Dios nisguie, ni scase goca, dipse len tson iz grol ni tib lab nis guie biabd; <sup>18</sup> haxta bnabraa me lo Dios guiaba stib, dzigoraa biaba, laa guidzliu biire bdeed guielnzaac.

<sup>19</sup> Bets, bzian, tel cho tib zha ne nacgrë to i sozit lo Xtiidz Dios, ni grieelo cho tib to ctsire zho næz yozh ne zie zho ga; <sup>20</sup> golgacnan ganle, ladzniale guielgut ga rsilaa zho zho, grëse xtol zha co zun Dios zhow perdon.

Santiagw

**Diidz ne rdeed guielmban  
New Testament in Zapotec, Mixtepec  
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

**Copyright Information**

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mixtepec

**© 1998, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 11 Nov 2022 from source files  
dated 29 Jan 2022

5317ca58-7555-5e4c-a420-e1e9210e2df2